

# Il nov disc cumpact «Top Pop Rumantsch vol. 2»

■ (cp) Radiotelevisiun Svizra Rumantscha preschenta il nov disc cumpact «Top Pop Rumantsch vol. 2» cun 18 perlas rumantschas. Bainvegni al Top Pop Rumantsch! La primavaira 2005 ha il Radio Rumantsch lantschà la retscha musicala Top Pop cun l'intent da crear popsongs rumantschs che pon concurrer cun la musica internaziunala al radio. Malgrà tut il ristg ch'ina tala avventura munta, dastgain nus dir oz che la retscha è daventada ina veritabla marca da success.

Trenta tocs dumbra ella en il fratemp, chanzuns ch'èn pli u main tuttas vegnidas registradas e producidas en la medema manufactura sonora – il studio Aquarium da Manfred Zazzi a Turitg – e ch'èn d'udir stediain sin las undas dal Radio Rumantsch. Questa segunda collecziun preschenta ussa ils tocs ils pli novs, 18 perlas, naschidas tranter la primavaira 2008 e l'atun 2012. Il disc nov documentescha ina giada dapli ch'il Top Pop è ina ballantscha tranter vuschs novas e fatschas enconuschentas, tranter tradiziun ed experiment. Anzi, questa collecziun demussa ch'il pass musical tanscha mintgatant sur la furma standardisada da ghitarra, clavazin e batteria, nus entupain excurs en il mund dal hip-



Cover dal «Top pop rumantsch vol. 2».

MAD

hop e dal reggae, gea perfin ina cruschada da jazz, pop e musica da sturs. Ins scuntra tant chantaduras giuvnas sco artists pli vegls, auda duets prominents e perfin ina chanzun da ballape intunada d'ina squadra dad otg differentas vuschs. Il Top Pop pussibilitescha damai er il stgomi tranter diversas scenas e generaziuns, e promova a l'ur era aventuras cuminaivlas sco per exempel la turnea interrumscha da l'onn 2012, il famus «chant au tour». E tant sco ch'il project avra a giuvnas vuschs la porta dal studio da registraziun,

tant animescha el da cuntinuar l'avventura. Quai illustreschan er ils novs albums da Theo Demund u da Casper Nicca, da Tiz u da NAU/Cha da Fö, ubain er las ovras da Bibi Vaplan/Bianca Mayer e Rezia Ladina, excellentas protagonistas da l'emprim volum. Il Top Pop – in trampolin per la musica moderna rumantscha.

Ils titels da la seria èn d'udir sut:  
[www.rtr.ch/home/dossiers/actual/Top-Pop-Rumantsch.html](http://www.rtr.ch/home/dossiers/actual/Top-Pop-Rumantsch.html)

Il nov disc cumpact pon ins retrair tar RTR per CHF 19.50.